

第十二本

卷二十一

人物下

96

列女

嚴州府志

笑廬署

嚴州府志卷之二十一

列女

分列已旌候旌按照闔屬縣分以貞女節婦爲次序孝烈並附

宋

徐師顏二女

建德人長清次湑年皆及笄元兵下嚴州師顏挈二女避於薛山父出而兵奄

至清謂湑曰吾家世清白不可受污辱遂相牽投崖死鄉人憐之立祠祀焉

徐大發姊五娘

建德人五娘與大發因母病刲肉療疾不約而同尤女子所難

元

王氏女

建德人至大間其父出耘舍傍遇豹爲所噬曳之升山父大呼女識父聲驚趨救以父所

棄鋤擊豹腦殺之乃得生

徐艮女

建德人幼習詩書孝友甚篤不忍遠離及二親繼歿寢苦枕塊哀悼欲絕將葬偕季弟親

營窀穸欲廬墓終制弟邈爲構小樓與墓相望俾寢食其中書永慕二字以誌焉

方良妻黃氏

淳安人二十七歲夫亡守節年七十八終泰定元年旌

余溥妻童氏

淳安人溥少孤母性至嚴童歸俞克承夫志以奉姑姑待之寡恩柔順婉遜不

見於色至正十三年賊陷威平官兵克之乃縱兵剽掠至溥家童以身蔽姑卒欲污之童大罵不屈卒怒斷其兩臂益大罵眾復刳其面而死

施仲甯妻朱氏

分水人朱本儒家女幼通書史及笄歸甯性柔順動必以禮元末兵亂轉

掠其鄉與夫攜子避難匿山谷中寇至倉猝離散賊逼之朱棄子自投於白石巖賊退子尋至巖下見朱安然端坐巖高數十丈其脫難得生若有神護

明

何盈女四姑

建德人孝子起門後也未嫁夫亡誓不再適歸夫家年至七十四歲終嗣子唐

天性孝友妻許氏年二十又寡孝姑課子有司以聞表為貞烈之門

陳氏女

建德人幼字馬采未嫁而夫歿時年十九采家境業蕭條有勸以改字者陳泣赴靈前以

死自誓遂歸馬氏守貞不

以上貞女

二孝事舅姑卒年五十七

方師夔妻孟氏

建德人元末師夔為鄞縣小溪寨巡檢卒於官孟時年二十七攜子原德

扶櫬歸竭力營殯舉夫家之不能葬者七均歸

窀穸操行貞潔守節四十餘年洪武十年旌

徐宗賢妻沈氏

建德人宗賢為商死於水沈年方二十二撫子名鎖自守既而子亦死舅

姑欲改適氏以死誓守節

三十餘年成化三年旌

福建巡按柴文顯繼妻余氏

建德人氏年十七歸文顯時文顯為福建巡按

被誣入獄余擊登聞鼓以聞及文顯論死弟文義

亦故余年二十三並舉二喪孀居四十八載教育

前子曦遺腹子晟俱成立曦後為政

和令氏卒年七十一宏治四年旌

口唐妻許氏

建德人貞女何四姑媳也未嫁而寡至夫家守貞擇嗣婚配許氏年二十又寡

事姑守節教養孤子並膺旌表建坊

朱仍壽妻何氏

建德人年二十八夫亡子幼養姑盡孝守志不移至八十歲卒 詔旌

其門

姚優妻詹氏

建德人二十二歲夫亡子尚遺腹矢心守節卒年七十二有司以聞給匾旌表

徐鍾妻邢氏子

行衢妻王氏三節建德人邢年二十八行衢入庠既而相繼夭折時王年二十四周年二

十二俱無嗣邢率二婦旦夕紡績共甘貧苦郡有檄云昔姑賴媳以終餘年今孀依姆以全晚節真誠可動鬼神志操永昭今古邢氏至八十三歲而卒周王皆孀居三十餘年萬歷五年知府楊守仁上其事奉 旨建坊旌表

唐良正妻張氏

建德人年二十六夫亡子幼姑病刲股以療及舅姑繼歿良正尚在浮屠

氏連葬三喪教子成立直指
方元彥疏其事旌曰節孝

宋邦棧妻馬氏

建德人年十八夫亡無子守節事姑以孝聞家無擔石紡績度日年七十

五終天
啟年旌

齊東縣教諭張曰新妻方氏

建德人崇貞末齊東被圍事急日新率其二子

力禦北門死焉氏聞訃奔死所有欲犯之者氏曰
吾一門忠烈豈容汝輩污我耶遂持匕首自刎齊
東士民至今稱之

吳士昌妾高氏

建德人明末鄭芝龍敗兵回閩所至淫掠氏爲兵所攫脅以刃不從遂投

塘死越數日家人得其屍
顏色如生或曰氏趙姓

生員楊銑妻陳氏

建德人銑以攻苦病瘵氏調理勤謹閱二寒暑年二十七夫亡舅姑

及子女皆無氏誓死相從親族力阻
氏佯諾之殮畢託言寢息仍縊以殉

方丕楷女兔玉

涪安人幼字東涵鄭滋未嫁滋亡玉

扶棺哭擗誓不再適楷止之便欲引刀自盡舅姑
諷諫亦不聽均察其誠不再強夫家立其姪一枝
為嗣娶婦潘氏未幾一枝復夭潘亦矢志共守
一門兩節始終不二知縣戴廷槐以貞節狀聞

方淑瑩

涪安人少受徐應芳聘年十六芳歿瑩聞訃

泣欲奔喪父母不允乃毀容翦髮服衰而哭
勺漿不入口父母婉諭之曰女未字何自苦為瑩
曰兒矢志不二願歸我遺骸同穴於徐時投經纒
時僵雪阱皆救甦父母百方勸之無改志舅姑聞
之逆歸喪服素車禮舅姑畢即赴芳殯所慟泣幾
絕遠近觀者莫不垂涕歎為奇節克盡婦職九載
勿渝舅姑歿代執子喪立嗣承祧曰吾今而後可
以遂初志矣不食數日而卒與芳合葬於汪塘源
縣令李光德憫其節往弔題其窆石曰烈女方氏
節愍墓訓導虞世愷曰皦如日

潔如雪至今涪人猶能言其烈

以上貞女

方稜妻王氏

涪安人年二十夫亡守節後子

任兵科給事中氏膺

誥封

邵衢妻盧氏

淳安人氏名瓊王永樂初衢隨父同知浙中謫戍卒於邊姑老子幼兄弟憐之

欲與同歸拒弗許奉姑訓子守節益堅年七十一歲終後孫正爲大甯知縣

徐福壽妻王氏

淳安人年十九夫亡守節景泰年間旌表

王文惠妻唐氏

淳安人年二十一夫亡守節成化元年旌

項文舉妻徐氏

淳安人年二十二夫亡守節成化十年旌

黃紳妻洪氏紳弟妻胡氏姪婦吳氏三節

淳安人洪紳甫一年而紳故止一女一日歸甯父兄欲逼之

嫁洪抱女觸寒冰濟河以歸誓無變志至十九歲卒

孀居同時守節人以三節稱

解寓妻張氏

淳安人氏家本上虞幼隨父成大同年十八歸寓二十一夫亡守節

王堅妻錢氏

淳安人年十八歸堅兩月而寡苦志守節至七十七歲終

何珽妻方氏

淳安人年二十歸珽甫三月珽亡守節有司表之

孫廷茂妻邵氏

淳安人年十八而寡誓不他適宗人強其再嫁自度不免遂赴水死

何廷傑妻戴氏

淳安人年二十四而寡有欲奪其志者戴以刀裂兩耳自誓孀居六十年

事姑盡孝至八十三

歲終有司表其節

方原齡妻徐氏

淳安人年十九歸原齡甫三日夫亡守志不二至八十四歲終

何瑗妻方氏

淳安人年十九夫亡守節六十年鄉里皆稱之

方祖慶妻金氏

淳安人年二十一夫亡守節至六十五歲卒有司以聞

柯道妻鄭氏

淳安人年十八夫亡家貧無子舅姑迫令改適自度難免遂縊死

任裕妻宋氏

淳安人右都御史曼之女也年二十七夫亡守節以終

周忞妻商氏

淳安人文毅公之女也忞領成化四年鄉薦尋卒氏遂守節有司以貞節聞

何廷智妻吳氏

淳安人氏名如玉年二十八而寡遂守節以終

童景春妻洪氏

淳安人年二十一夫亡生子甫周歲守節終身

鄭二枝妻方氏

淳安人年二十餘二枝歿方矢志守節時有程某者欲娶之方氏以死自

誓程復爲必娶計方知之度不得免飲藥而死隆慶間巡按吳從憲表上其事建坊旌之

鄭一枝妻潘氏

淳安人貞女方免玉媳也玉未嫁因夫鄭滋歿臨喪至鄭門守節孝事舅

姑後立滋姪一枝爲嗣娶潘未幾一枝亦夭潘繼志堅守知縣戴廷槐并免玉事以貞節狀聞

徐應裕妻葉氏

淳安人適裕甫二載裕歿氏伏棺悲號氣絕復甦逾月遺腹子亦殤泣曰

吾忍死須臾爲此一塊肉耳今且絕望生欲何爲卽引刀自割姑覺奪刀泣相告曰汝舅歿未期年汝夫又死僅存汝叔今纔半歲賴汝襄撫以延徐祚汝身關係甚重徒死何爲葉勉存之孝姑撫叔自十七歲守節至八十三歲茹苦六十七年艱難萬狀輿論同稱萬厯間直指鄭繼芳疏其事旌表

建坊

盧應麓妻徐氏

淳安人夫亡守節歷六十餘年如一日院道屢加旌表

汪侑傑妻李氏姪媳王氏雙節

淳安人幼歸侑傑事嫡庶兩姑以孝聞及

侑傑病亡遺幼孤撫之成立二姑一病盲一病痿奉養惟謹皆藉以壽終氏年至八十一歲卒姪一

泰死遺妻王氏亦

賴李以完節稱

王應元妻徐氏

淳安人年二十夫亡舅亦隨歿姑媳孀居徐孝事惟謹歷十八年咸稱苦

節院道累

爲表旌

周爾行妻張氏

淳安人年十七夫亡守節至八十二歲終院道屢旌

方淥妻邵氏

淳安人邵彥昇女也歸方未及二月淥

孤貧欲奪其志誓死不易晝夜紡績以養舅姑年至七十餘卒子克成立里黨咸稱節孝

余璧妻解氏

淳安人年二十餘而寡子甫三歲守志

能教辛勤紡績艱苦萬狀余氏門戶賴以不墜子初領正德庚午鄉薦人以爲食天之報亦解氏慈訓之力居多年

至七十餘卒

周愍妻方氏

淳安人進士方才曾孫女也歸周仲連

亡改節氏年十九獨守志不移家貧紡績以養舅姑及舅歿悲其無後時連弟瑜之子惟敏失怙恃氏亟爲婚之生子二氏遂立其次子俸爲夫後姑年八十有二患風疾不能自支氏扶持起居躬親湯藥浣滌污穢無難色凡五十年如

一日宗黨以節孝稱之年六十餘卒

張佑妻宋氏

淳安人年十九歸佑僅二載佑貧甚盛暑入山鋤粟勞渴飲水成疾而卒氏哀

毀幾絕遂不復食每見粟輒悲痛弗能已然年少有姿容求婚者旁午惟以死自誓立其夫之姪爲後自製殯殮衣衾示無他志時有挾勢欲其更適者氏泣然號泣往還陳義訴於所親其人逼令登

輿氏度力不能勝佯許入室沐浴更衣就牀自縊
聞者酸鼻參議方天雨作烈婦傳有云氏朱姓

生員應恪妻吳氏

淳安人年十九歸恪二十二夫亡
苦志甘守以奉祀撫孤爲重有以

改適言者輒斷髮自誓閉戶辟繡四十餘年雖親
子姪罕覩其面尤力以詩書教子孫人多敬之

童朋妻方氏

淳安人年十九歸朋未二載夫卒卽翦
髮自誓或微諷之輒正色不言孀守數

十年足不踰閭童稚無故不得入所居擇立夫兄
子名貫爲後撫教有方克成立氏年至九旬卒

方彥顯妻魯氏

淳安人年二十五而寡貞潔嚴凜宗
黨敬仰之謹事舅姑訓子以詩書嘗

建一室以自居方氏門戶賴以不
墜年七十三歲胡莊懿公有記

何金鹿妻魯氏

淳安人年十六成婚後三載夫亡哀
毀幾絕舅姑憐其少寡無子嘗於除

夕微諷之氏執刀以死自誓舅姑遂不敢強逾年
舅娣執柯强爲童氏子委禽魯自舅娣來勺水不

入口比七日而議者不已恐終奪
其志遂自縊死聞者莫不歎息

童汝弼妻方氏

淳安人年十七歸弼事姑盡孝弼遭疾支牀四載竭力調養籲天請代及

革誓以身殉弼曰母老子幼汝死無益也遂卒氏慟泣幾絕苦志堅守姑病刲股和藥以進課子慈教兼施嗣娶媳某天折復撫幼孫均克成立院道題旌表閭

方啟常妻任氏

淳安人年二十一夫亡遺孤甫三月矢志誓守孝事舅姑義方訓子八十

四歲卒守節六十餘年邑令蕭旌表之

應德新妻吳氏

淳安人年十九生子錡闕七月而夫亡哀慟欲以死殉姑曰若抱者誰乎

遂勵志撫孤竭力事姑茹荼矢柏始終無間至六十歲卒

童時成妻王氏妾徐氏

淳安人王年二十六無子勸夫置妾納徐氏未幾成歿徐

有遺腹嗣生一男王泣謂徐曰童氏一綫吾當善爲撫育汝各行其志可也徐痛哭剪髮自誓願終身共守養孤成立矢無他志二孀節義鄉里稱之王七十四歲卒徐七十二歲卒

鄭臺妻方氏

淳安人年二十夫溺死遺孕在腹屢志守節貧窘異常教子入庠八十三歲卒

何其良妻應氏

淳安人年十九生一女夫亡矢志堅守繼姑頑叔逼其改適氏毀容翦髮

持刀自誓後立嗣承祀邑令楊獎以節凜冰霜六十一歲卒

徐九采妻童氏

淳安人年二十二夫亡守節六十八歲卒

汪良臣妻王氏

淳安人年二十夫亡守節壽至九十歲卒郡邑旌曰完節可風

方夢麟妻吳氏

淳安人年二十五夫亡苦志自守八十五歲卒計守節六十年

方惟榮妻任氏

淳安人年二十七榮亡堅志守節八十歲卒

徐寶妻方氏

淳安人年十八夫亡守節七十三歲卒

張繼志妻姚氏

淳安人年十三父遭危疾割股和粥以進父疾遂愈及適繼志孝事舅姑

夫亡矢志守節以終其身

徐良弼妻李氏

淳安人年二十五而寡矢志撫孤族
人有利其資產者百計搖之堅守勿

動及子稍長卽延師教誨迄有成立守節五十九
年八十三歲卒臨終謂其子曰吾生平不信釋老
死後慎毋作佛事姚文

敏公題其墓曰貞節

胡世相妻鄭氏

淳安人年二十夫亡守節
壽逾九旬有司給粟以旌

方待徵妻盧氏

淳安人進士盧鴻女也徵早喪矢貞
不二八十歲卒邑令林旌表其閭

任裕妻戴氏

淳安人
見通志

余方氏妙姿妙善

遂安人長姿幼字洪氏後洪氏替
不能聘方乃淪盟改字富室汪姓

姿大志不從洪訟諸官以有聘斷女歸汪姿遂截
髮嚙齒誓不適人其殊妙善素友愛亦誓與同志
父母諷諭萬端終莫能奪方將業產爲姿善與諸
子各半分析並以續密室處二女遣老僕婢供役
姿善性勤儉事父母克盡孝養晚年頗饒於貲以
盈餘益諸兄弟年至耄耄而終方世居遂之社壩

時人號曰社墩二貞
女并表其墓曰雙貞

章氏女

遂安人幼受毛一逢聘未嫁而逢卒女年十

五聞訃大哭卽欲奔喪父母及族人百計解之弗聽翦髮使人持以貽姑父母知其志不可奪聽之歸哭於喪側號不絕聲俗尙用道士焚錄以度亡者氏投火殉姑及侍兒急救得免遂又不食姑力強之勉進饘粥終日坐卧一櫬非姑病視湯藥勿出也奉

旨建坊表其貞烈

以上貞女

詹佳妻余氏

遂安人年二十九夫亡守志洪武元年旌

周宗明妻方氏

遂安人年二十七夫亡守志節布政使司余復爲之傳

張廷輝妻洪氏

遂安人生子冕甫一歲而輝卒洪矢志撫孤事姑盡孝雲間錢溥爲之傳

姚文節妻吳氏

遂安人年二十八夫亡守節洪武二十八年旌

余欽妻方氏

遂安人歸欽逾年生子月餘夫亡守節有司旌之教諭劉元爲之傳